



14-08-2018

UKA 2018/062

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

**Namminersorlutik Oqartussat suliffeqarfiutaanni aktieselskabini siulersuisuinit siulittaasunik toqqaasarneq pillugu oqallinnissamik siunnersuut.**

(Inatsisartuni ilaasortaq Jens Napātōk', Partii Naleraq)

Kalaallit Nunaanni Namminersorlutik Oqartussat aamma pisortat suliffeqarfiutaanni aktieselskabini anginerni<sup>i</sup>, akunnattuni mikinernilu kisermaassilluni piginnituvoq. Kisermaassilluni piginnittuunerata periarfissippaa nammineerluni suliffeqarfinni taakkunani siulersuisuinit siulittaasusunik toqqaasarsinnaanera. Taamaakkaluartoq siulersuisuni siulittaasut amerlanersaat Kalaallit Nunaata avataani inunngorsimallutillu alliaartorsimasuupput<sup>ii</sup>.

Nunamut namminiilernissamik siunertaqarluni ingerlatsisumut tamanna naammanginarnerpa?

Isumanga naapertorlugu nunarput ukiut ingerlanerini ilinniarluarsimallutik ilinniakkaminnik naammassinnittartunik, inuussutissarsiutitigut misilittagaqarlualersimasunik kiisalu suliffeqarfinni siulersuisuni suleqataanermik misilittagalinnik, siulittaasut sulinissamut piukkunnartunik toqqangasaqarlualersimassasoq qularinngilara.

Tamatumunnga ilanngullugu puigussanngilarput nunami maani inunngorsimasut alliaartorsimasullu nunamut matumunnga tunngatillugu ilisimasaat, inuiaqatigiit aaqqissunneqarnerannut ineriartornerannillu ilisimasaat, minnerunngitsumillu kulturimut oqaatsinullu tunngatillugu ilisimasaat, ava-taaneersut pigiliussinnaanngisaat nunaqavissunit pigineqartarmata. Ilisimasat taamaattut suliffeqarfinni siulittaasunik pissutsit pitsaanerpaat aallaavigalugit nalilersuisinnaanermik periarfissisartut, unammillernartunillu nalaataqarnerni suliffeqarfimmut inuiaqatigiinnullu naapertuuttunik aaqqiissutissanik tikkuussiniarnernut tamakku qularinngilara iluaqutaasartussaasut.

Taavami soq ilinniarluarsimallutik ilinniakkaminnik naammassinnittartut atorfirmullu piukkunnarluartut annertunerusumik atornianngilagut?

Pissutsit taamaanneri naapertuutinnngilluinnarput, tassami 1979-iminngaanniilli Namminersorneq eqqunneqarmalli kalaaleq nunami ineriartoranut isiginnaartussiaannartut avataanut inis-sisimajuarsimanerat annertuaallaartoq, akuersaarneqarsinnaanngitsoq, Partii Naleraq isumaqarpoq. Ineriartornerlu tamanna avataaneersunit suli maannamut aquunneqarpoq.



Tunngavilersorneq taamaattoq ammip qalipaataanik imaluunniit nuna allamiunik immikkoortitsini- arnermik siunertaqanngilaq, paarlattuanillu Partii Naleraq isumaqarpoq piffissanngorsimasoq nunap inuui aallaavigalugit nuna manna piorsarneqarlunilu ineriartortinneqalissasoq, aatsaat taamaa- liornikkut tamakkiisumik nunap inuui aallaavigalugit sulinerput pimoorunneqarnerulissasoq isuma- qarput.

Suliffeqarfiit Namminersorlutik Oqartussanit pigineqartut inuiaqatigiinnut pingaarutilerujussuarnik suliaqartarput soorlu attaveqaqatigiinnermut pilersuinemullu tunngatillugu. Suliffeqarfiit katillugir 3,500-inik sulisoqarput, amerlanerpaartaallu Kalaallit Nunaanni sulipput. Suliffeqarfiit Nammi- nersorlutik Oqartussanit pigineqartut Kalaallit Nunaata ineriartornerani pingaarutilerujussuarnit inissisimapput.

Tamatumunnga ilanngullugu erseqqissassavarput nunatta aningaasat kaaviaartitaat aatsaat anner- tusarneqarsinnaammata suliffeqarfinni aktieselskabini Namminersorlutik Oqartussanit pigineqartuni siulersuisuni siulittaasut amerlanersaat kalaallinik inuttalersorneqarpata. Oqallilluarnissassinnik kissaappassi.

<sup>i</sup>Royal Grenland A/S, Royal Arctic Line A/S, Visit Greenland A/S, Tele Greenland A/S, Great Greenland A/S, Boligselskabet INI A/S, NunaOil A/S, KNI A/S, Sikuki Nuuk Harbour A/S, Greenland Holding A/S, Illuut A/S, Kalaallit Airports A/S.

<sup>ii</sup>Namminersorlutik Oqartussat suliffeqarfiutaanni aqqaneq-marluusuni tallimat siulersuisuni siulittaasoqarput Kalaallit Nunaanni inunngorsimasunik imaluunniit peroriartorsimasunik. Suleqarfik ataaseq taamaallaat siulersuisuni siulittaasoqanngilaq, siulersuisuni siulittaasoq maani inunngorsimasoq tunuarnikummat.

Link una atorlugu siulersuisut aqqissugaanerit nassaarineqarsinnaavoq:  
<https://naalakkersuisut.gl/da/Naalakkersuisut/Departementer/Formandens-departement/Bestyrelsessekretariatet/Bestyrelsessammensaetning>